



www.udinese.it



www.arlef.it



www.comune.udine.it

Il Stadi Friûl tant che il Camp Nou

Cun talian e inglês, ancje il furlan te segnaletiche, te comunicazion e tes ativitâts di intratigniment prime de partide graciis a Udinese Spa, ARLeF e Comun di Udin.

La societât Udinese Calcio Spa, il Comun di Udin e la Agenzie Regjonâl pe Lenghe Furlane a àn firmât un protocol di intese che al implemente la presince dal furlan dentri e fûr dal stadi, tes azions di comunicazion, ancje visive, de societât, di animazion prime de partide e di fidelizazion dai tifôs.

L'acuardi – firmât dal President dal Udin Franco Soldati, dal Sindic Furio Honsell e dal President de ARLeF Lorenzo Fabbro – al rapresente une azion impuartante di ricognossiment e di valorizazion de pluralitât linguistiche dal teritori sore che un criteri destinât a puartâ svilupps interessants tal cjamp dal marketing e de promozion.

La gnove esperience e avvicinarà cun di fat la Udinese Calcio a ce che al è za stât sperimentât cun sucès in cetantis realtâts de Europe – par citânt cualchidune, il FC Barcelona e l'Athletic Club Bilbao - che a son diventâts ricognossibii e plui interessants ancje par vie des lôr specificitâts linguistiche e culturâls.

Il plan di azions che al fasarà diventâ la Udinese Calcio Spa “uniche” e “speciâl” tant che il teritori plurilengâl che e rapresente tal panorame dal zûc dal balon nazionâl e european, al proviôt la realizazion di cartelonistiche e di segnaletiche plurilengâl (talian, furlan e inglês) interne e esterne dal Stadi Friûl, l'ûs de lenghe furlane tes iniziativas promoziônâls, informativis e di intratigniment prime de partide e te polse, lis comunicazions di servizi plurilengâls, la presince de lenghe furlane tal sît internet dal Udin, te sezion dedicate ai tifôs e o in sezions specifichis. Tal avignê e vignarà studiade ancje la pussibilitât di fâ compagnis di comunicazion e di abonaments plurilengâls.

*“O sin sodisfats e braurôs di vê dât il nestri contribût in chest percors li che, ognidun pe sô part ma ducj te stesse direzion, o sarin part te difese, tal timp, di un ben preseôs tant che la lenghe furlane”. Cussì al coment il President di Udinese Calcio **Franco Soldati**. “L'Udin – al va indenant Soldati – al à simpri rapresentât, sore che la passion pai siei colôrs, un pont di agregazion fuarte dal sintiment di identitât e di apartignince. Il teritori al è simpri protagonist tai nestris pinsîrs e di fat, in cheste direzion a son stâts fâts i sfuarçs dai ultins agns, par esempi la creazion di un pôl strutturâl in stât di permeti aes impresis di cjatâ dongje cjase servizis impuartants e supuarts par svilupâ il lôr ‘business’. No podevin fâ di mancul di impegnâsi cun ARLeF e Comun in cheste iniziative”.*

Chest il parê dal Sindic di Udin **Furio Honsell**: “Il patrimoni dal furlan al è un patrimoni une vore impuartant che si à di tutelâ in ogni ocasion e cheste e je une vore significative, propit parcè che l'Udin e il stadi dutis lis domeniis a son un dai elements di agregazion dal Friûl. Promovi duncje in chel contest la lenghe furlane al è cetant significatîf. Une lenghe, ancje se minoritarie, e je simpri un patrimoni, propit parcè che e garantîs la oportunitât di vivi intun contest di plurilinguism che, cemût che o ai simpri sostignût, al è simpri une vore impuartant sedi pal aspîet storic culturâl, sedi par chel cognitîf. In chest sens il stadi Friûl si conforme ai grancj stadis europeans tant che chel di

Barcelone o di Glasgow tal doprà il veicul dal zûc dal balon globâl par sostignî lis lenghis ancje minoritariis”.

Daûr dal president de ARLeF **Lorenzo Fabbro**: *“Graciis a chest progjet e ae sinergie svilupade dai trê sogjets cjapâts dentri, il club plui impuartant de nestre Regjon, cognossût e preseât in dut il mont, al promovarà in maniere originâl e efficace i siei servizis e cussì al garantirà il rispjet dai dirits linguistics, rinfuarcint il leam cui tancj tifôs in Friûl e tal forest e, plui in gjenerâl, stiçant la atenzion de opinion publiche ancje a nivel talian e european. Lis lenghis e il sport – al va indenant Fabbro – a son cetant impuartants pal benstâ e la coesion sociâl e tant che ARLeF o volin lâ indenant tal rinfuarcî la presince de lenghe furlane in chest setôr. Il prossim pas al sarà la presentazion de App par furlan pe gjestion des scuadris sportivis che si davuelzarà ai 7 di Novembar li dal implant sportîf di Remanzâs: il prin, o sperìn, di une lungje schirie di cjamps sportîfs dulà che il furlan al sarà “di cjase” in ducj i sens (segnaletiche, strissons, publicitât e v.i.)”.*

Udin, ai 30 di Otubar dal 2015